

Dzaquie de Cathéhene

Voey, vuiui vo je conta oun'histoère quie è pachäye veri, intchiè no, y a djâ gran tein. E don vertablo. Vo a je conto come i havui méimo d'i j'anchian, et come a te conton é vio i dzouhenno, peindein à veilla.

Bon: i haï oun âdzo, û vehâdzo d'a Crettaz, de Nend'Hâta, oun vio célibataire, (oun vio dzouhenno, coume on dit). C'appehâe Dzâquie de Cathrenna. Ire du bî gautze. Pouète. Pouète îre poûro, câ, de ché tein-ré, oun bâta poey pa heretà, mé quié o câ du ben d'à mamme. Mahoeureujamin! Chin fé quié Dzâquie poey à peina hinvernâ quaque tchièbre é dou u ben trey tzaon de fâes. Ire biau quand arrouae, é bon j'an, a intreteni ounà atze à coumande.

Mâ, ire oun bon type. Ire oun bon trâilleu: i voajey a dzornîha é é patron o te estimâhon. Avoe chin ire pa nal de vejadzo é de façon é ire oun to finau. Ben choeiro quié, malgré quie ire pa retzo. i haï proeu de dzouhenne quie aran pa demanda mio quie d'o t'haï po maria! Ma. Dzâquie, che mafiae é ch'achiée pa preindre!...

A can meimo ita cho poën de fourni martchià avoe yona... Ire intre é dou, indéci, ... Fo che décidà, ouna demeindze, a metu chù oun denà po quatre perchônne; po ouna fenna et po dou infan. Addon che metu in tâbla. A d'abo j'u mindgia a chavoà porchion. Ma, é pà ju chou! Ei ya fallu attaca à rachion d'a fenna! E pa ju chantefè! Ei ya fallu, oùco chin di meynâ!...

Can che té ôta di tâbla, che dit intre hiui: orà, dabetesque chié gro mindjoeu, dinche é quié chié tan pouro quie chin, âcho pla de me marià!... A poète fé à chèhy a meytreicha quie fallie pa mey conta chu hiui...

Cepandan, i fau qu'aque tzouja, a homo, po pacha o tein, po occupa choun espri. I fau de pleyji. Câ, oun n'e pa inu in chi moundo rin quie po mindjié.... Chu to, pe hle ondze né dehivé, i fau de pachatin. En plache d'ouna fenna, Dzaquie, chet'atzetâ oun roubet (violon). Ma roubet po roubet, arei mio vahu ouna fenna! E verey, quié oun roubet è moin coteu a entreteni. Bref, aï prey choun parti.

Can aï fournei de goerna è tchièbres é é fâe, rintrâe her meyjon, aviâe o foà u forné é fajey a popota. Aprei sîna, preinjeu o roubet. Arrouhâon é veillheu. E j'oun, po acoeutâ djuet; d'âtro, po discouri é menâ à piorna. De reista, ire oun pleyjin compagnon é chéi todzo preu déquie deyre.

Primié é veillheu, i vinieyî oun dzouhenné de dijечат'an, du vehâdzo vejîn. Chappelhâe Dominique. Aï idée d'apprende a menâ o roubet. En effé, che dejeu intre hiui: che poècho apprende adrey a djuet, oun'arey pa mey bejoin d'aha quiri âtr'a pa de djuheu po danchié i j'elechion et u patron a chin Eijiet. Ch'ire atzetâ, in catzette di parin, oun bio roubet! A djiéj'heure, can é j'âtro veillheu iron partey fajan ouna partie è dou einsimblo. Dzâquie inignée à Dominique...

U mei de novembre, Dzâquie, a djiù parti po o mahin, avoe é tchièbre é é fâe. A fallu addon che quittâ. Dominique a pa méi puchu preinde de j'eyssons, tan quie prosse de Tzaheinde. Addon, dejerton tchui di pé mahin. Decheindon é bîchie pé vehâdzo. Y a troà de ney, fê croé tin, puon pa mé tini niou.

Chin fé quie ounà né (ire mei né quie dzo), Dzâquie, arrûhe ba avoé ch'oun nourrein (troupeau). Ma, aï oun boquie in convalescence (aï itä mahado u mahin). Ein arrouhin, o te mîne, derein o pîlo, é en atteindein voa cajerna è j'âtre bitchie u boeu. Entre-tein, arruhe Dominique avoé o roubet... Dzâquie o te fé intra u pîlo avoé o boquie. Ei coumande d'avia o foà u forné, to't à topon. Meimo, aï troa à feyre ba pé o beu.

Dominique, can a j'u etzeuda o forné, prein o roubet et che met a djuet. Aprey oun momin, avhoui-ti pa de pâ chu o plintchiè: Toc, toc, toc!

- Quié é-ti chin?

Torne à djuet: Toc, toc, toc! Arrite de djuet: pa mei rin! O trejième coup, torne a djuet é tore avoheire: toc, toc!

Ma chi coup é méi proso de hiui! Etein è brei é empûgne ... de cornes, de groche côrnes!!!

Dominique chè mouje quiét'i diable! E j'u eimpoéria! Ache tzeirre o roubet cho pleintchiet, prein a porta é via! Cheûte ba pe n'a pôrta derri, d'à vatieu de quatre à cin mètre, ba pa ney...

Can a j'u fournei de cajerna é de bailliet à mindjiet i bitchie, Dzaquie, vein énaà u pîlo. In arrouhin a rin troha quie o bocquie.

Chiichi, can a j'u chintu o tza du forné, a couminchia a curi po pîlo é a tapâ di piâ in avouhijin o roubet! I battei pout-eitre a mejoura? Dzaquie trûhe o roubet chu o plintchiet, ma de Dominique, rin! Dèquie y a? Avoé chare-ti? Chin torne fûre., é fé o to da meijon. A poète troha Dominique ba pa ney! quie plorâe.

- Dequie-t'a? Pourquoi tu ploere?

- I cheutâ bà, d'i éna pa porta derri, i trocha a tzamba !

- Pa puchiblo? fé Dzaquie!

Ma, can a j'u éjamina, a ità obligia de quèrre... I tzamba gautze, ire bel é bien catchaï. O te prein pé é brei é o te porte éna u pîlo. O te met cho hiet, in atteindin.

Chin'parte bretchie (quiri) oun mîdzo, Horoeujamin quie y aï ioun u Gran-Vehâdzo. Oun momin apré, arrhue é ey arrindze a tzamba, avoé de coutelettes de boû é ein mettin de bona greiche di marmotte. O hindeman, é parin o te prinje e o te pôrton ermeyjon, in tchie lou.

Adieu o roubet! Adieu a danse! A pa meh puchu appreinde a djuhet! I diable o t'aï djia pé man! De ché tein-ré, can ioun menâa o roubet, ire ouna dzein perdu! "Atre", che trohâe perto u meitin di bal. E poète quie, Dominique quie ire oun bon chrétien, quie ahâe tzanta élige, quie cogniechei o plain-chant, che dejei intre hiui:

- I mundo, dequie deret, d'ahâ menâ o violon? Adiu, o te câcho dejo è piâe!

E é chin qu'à fé...

Per'oun bio dzo, défourtin, quan è tzemin chon meh bon é quié j'u tan mein voarei, Dominique, ouna demindze, prein a canne é che met in rotta po élige in Bache-Nenda. I tône a preindre plache pé stalles éna in cou (de ché tin-ré y n'aï pâ de tribune), djeusto in face d'a porta d'a chacritchia. Ma, can chet-inû i momin de couminchié à mècha, incourâ, Mouchiu Farquie (irè oun fachieu) é chaï tota histoère du bocquie é du diablo; poèi pa chourti da checrétia. Tchui é coup quie vignei a porta, vehei Dominique. Fallie quié ouchei torna in derri po repreinde o sérioeu! Oun fou rire quie poèi pa arretâ, o te preinjey....

Dominique ch'é convertéy. A pa meh menâ o roubet. Ma Dzaquie pa!.

E vio dzouhenno chon meh indourchey....